

Visoki predstavnik će podnijeti izvještaj Vijeću sigurnosti UN-a



Tokom ove sedmice, visoki predstavnik Valentin Inzko boravi u Washingtonu i New Yorku, gdje će podnijeti 51. izvještaj Vijeću sigurnosti UN-a. Za vrijeme svog boravka u Washingtonu, visoki predstavnik će se sastati sa visokorangiranim zvaničnicima Bijele kuće, Vijeća za nacionalnu sigurnost SAD-a i State Departmenta, kao i sa članovima Republikanske stranke predsjednika Trumpa u američkom Kongresu.

Nakon podnošenja izvještaja Vijeću sigurnosti UN-a, planiranom za četvrtak, visoki predstavnik Valentin Inzko će se sastati sa nekoliko stalnih predstavnika zemalja članica UN-a.

Visoki predstavnik će iskoristiti priliku da upozna svoje sagovornike s trenutnim razvojem političke situacije u Bosni i Hercegovini, kao i s političkim trendovima i perspektivom za BiH. "Bosna i Hercegovina nastavlja poduzimati napore na putu ka evroatlantskim integracijama. Vlastima BiH je uručen upitnik EU, a okončano je i prilagođavanje Sporazuma o stabilizaciji i pridruživanju. Još jednom pozivam vlasti na svim nivoima da se fokusiraju na put koji BiH vodi ka EU i da u tom smislu ubrzaju svoje aktivnosti."

Uprkos ovim pozitivnim naporima, Bosna i Hercegovina se u proteklih šest mjeseci takođe suočila i sa nekim izazovima koji su navedeni u izvještaju visokog predstavnika.

U pogledu predstojećih aktivnosti, u Bosni i Hercegovini u jesen 2018. slijede opći izbori. Organi vlasti BiH moraju osigurati ispunjenje svih uslova potrebnih za neometano održavanje izbora i što bržu implementaciju izbornih rezultata, rekao je visoki predstavnik.

Poruka visokog predstavnika vlastima BiH je da što bolje iskoriste predstojeći period da bi pokazali biračima da mogu naporno raditi kako bi osigurali bolju budućnost i proveli konkretne reforme u cilju poboljšanja situacije u BiH.